



汝陽縣志

上 十

內閣文庫		
番號	漢	14729
冊數	10 (9)	
函號	史	183 13





汝陽縣志卷之十

外紀五

志曰

外紀

者何有舊載而不得意為去又不能

聚入者舊不載而旁為搜入不妨續及者若機

祥示異也塚墓表賢也寺廟通神也治亂見于

武功古今備諸藝文又曷可畧與

左史記事右史記言尚矣事無論巨細必登而

信非文章不傳倘亦謂遺諸掌故恐將來莫可

機祥

寺廟

塚墓

碑記詩集附

攷耶邶或繫之篇終則事與言會謂可以繫志
耶觀乎天察乎地參之以人志之總其成也三
才備焉志輿地始天文志外記終藝文易曰人
文化成孤曰其文則史連卷合編固纂定之莫
或遺然襲績故事領携大義要取諸明倫焉爾
機祥

漢元光五年辛亥大水壞鄉民舍

建昭五年丁亥汝南大水

元初三年己卯冬雷

晉咸寧二年丙申九月麟見於汝南

義熙五年己酉汝水竭明年南燕亡

陳大建七年乙未四月豫州於所部得青牛

隋開皇間汝水得神龜腹下文曰天下楊興

唐天寶間豫州獻嘉禾地裂石出高五六尺廣袤丈

餘秦宗權時

梁開平元年丁卯汝蔡蝻生有野禽蔽空食之盡

周廣順三年癸丑旬日無鳥忽聚壓樹枝折

宋建隆二年辛酉霽雨害稼

陸地行舟詔發丁夫浚蔡水入潁

端拱二年己丑春大旱蝗民多饑死

淳化三年壬辰大燔民居官舍三千餘區

景德三年丙午麥斗十錢粳米斛二百

祥符元年戊申醴泉出汝陽鳳原鄉有疾飲之即

愈

元豐初靈芝生汝陽陽安鄉

政和元年己亥蔡州進瑞麥圖

一莖有四五穗者

政和四年壬寅山石變為瑪瑙尚方取為器玩

金皇統四年甲子歲饑

流民典身為奴婢者官給贖為良放歸其鄉

明天順元年丁丑蝗免田租

成化十九年癸卯府學大成殿右柱產芝赤色六

出

弘治十四年辛酉大有年

正德三年戊辰大旱人相食

七年壬申黑霄見人皆鳴金操刀以逐

十四年巳卯地震屋瓦有聲

嘉靖元年壬午兀日地震

二年癸未霪雨害稼

三年甲申元日地震

八年巳丑旱蝗

十八年巳亥大旱蝗飛蔽天明年春大疫人相

食

詔免本年田租之半仍遣官賑濟

三十二年癸丑大水壞民田廬

詔免田租之半

三十四年乙卯地震有聲

三十六年丁巳飛蝗蔽天

四十一年壬戌大風偃禾拔木

隆慶二年戊辰訛言檄選官女闔郡嫁娶殆盡

四年庚午夏大雨無麥

萬曆九年辛巳七月雨雹傷稼

十一年癸未十二月羣鳧東飛蔽天

十八年庚寅清明日黑風自西來揚沙拔木

二十年壬辰夏汝水臭

家汲泉以糞

二十一年癸巳大雨自三月至八月

黑風四塞雨若懸盆

魚游城闌舟行樹杪連發十有三次是冬大饑器資牲畜樹皮草根俱盡

二十二年甲午春人相食

癸巳九月至明年四月剛壞屍孺塚墓啖

生人父子兄弟夫婦互為俎而賈人肉於帝夏大疫飛蠅蔽天自北而南野蒿如林成拱成把

三十一年癸巳春霪雨七旬

三十三年乙未正月雷電大雪

三十五年丁酉元日大風撼屋

四十年壬子有年

四十四年丙辰蝗食禾殆盡

四十六年戊午八月大水九月雪

四十八年庚申大旱秋蝗

天啓元年辛酉正月元旦大雪彌月

四年甲子秋大風大雨傷禾

崇禎五年壬申秋八月霪雨大水平地操舟

六年癸酉冬十月有鳥鳩身猴足晝飛有聲夜棲沙洲近火得捕之名曰寇雉是月寇遂渡河犯汝次年是鳥盡死內鄉

七年甲戌春大饑民多莩死

八年乙亥秋旱碾塊待雨正月種麥

九年丙子春大疫穀貴民多饑死父母妻子折離糜人而食甚有母食子幼食老者田土自此荒蕪

十年丁丑汝水臭

十一年戊寅夏城內井乾

十三年庚辰秋七月大風拔木村屋多捲去

十四年辛巳冬大饑米麥斗錢千二百雪深三尺民多凍死流徙

秋
十六年癸未春三月大雨麥爛秋七月大雨無

秋
十七年甲申春大饑冬大雪秣穀千五百一斗

男女逃竄爲人奴使

國朝

順治二年乙酉秋大水

四年丁亥春大旱麥莠不實

六年己丑夏四月大雨水溢道路牛馬多淹死

九年壬辰春二月夜半地震屋動秋大水害稼

十一年甲午冬十月地震

十二年乙未春旱

十四年丁酉夏四月雨有麥

十五年戊戌夏大雨秋大水傷禾

十六年己亥春霪雨入夏麥淹沒多糶秋大雨

菽穀不收

十七年庚子春大饑

府縣設南北二場煮粥賑濟西遂人皆就食窮民不

至轉徙活者億計

寺觀

開元寺

東門內唐開元二年建洪武十八年都綱
月山重建萬曆間僧官義如重修順治戊
子年春正月重建後殿五楹十四年重修二門
三間僧官周棟募建

清戒寺

城內西南隅唐時名草寺後名清涼寺弘
治十四年勅賜今額萬曆間住持宗允重
修順治二年僧超狀重修殿後大士樓五楹禪
堂五楹

懸瓠觀

城內西南隅正統間知府李敏奏因舊基
新建置道紀司崇禎七年崇王重修

真武廟

府治內洪武二十一年知府張勉建廢在
舊察院東成化十年崇王奉勅建

許楊廟

漢建武中太守鄧晨建於都官圖画形像
百姓祀之廢

高興廟 城內閭巷口廢

韋順祠 城內廢

崇左史劉公祠 城內西隅廢碑存

崇胤菴 城內西南隅萬曆十八年郡庠生牟二實置地造像運使劉自化合力募建

崇寧菴 城內東南隅萬曆十七年崇府建廢

關王廟 東月城內成化九年千戶郭振建正德六年僉事王玠修萬曆年間御史李本回重修有碑記

關帝廟 府學東

靈官廟 北月城內嘉靖間建燬順治八年重修

武穆鄂王廟 西月城內正德六年霸寇至城下王神現城上監生李秀韓銳總旗張環

建順治十五年義民李可行重修

炎帝廟 南月城內嘉靖初年崇藩建

聖哲宮 東月城內嘉靖後廢萬曆年間大叅熊勳學祈嗣建御史羊可立鑄鼎爐一座

普照寺 城東二十五里金明昌五年建

護法寺 城東十五里至正元年建

崇勝寺 城東平輿至正間建

水月寺 城東九十里正統間修

白虹寺 城東九十里天順間修

彌陀寺 城東西長店天順間修

永興寺 城東三十五里成化間修

龍水寺 城東南生王店成化間修

龍泉寺 城東南王堽店成化間修

洪慶寺 城東九十里弘治間建

慈忍寺 東關正德間唐銘建萬曆間知府黃似華重修廢

萬福寺 城外東南隅有浮圖十三丈高陵劉自化募建廢

東嶽廟 城東北三里前代建莫考宋天聖景祐間重修明吏部尚書李宗延建仁聖坊

三官廟 東關濟民橋上廢

光武廟 城東三十里

僊翁廟 城東九十里正和二年重建

霹靂將軍廟 城東南射橋店靈異甚著廟氏莫詳其源

蕭公晏公廟 城東南汝河岸舊蕭公廟在河西街北廢

天僊廟 東關嘉靖三十二年崇府建廢

大覺菴 東關嘉靖四十一年崇府建廢

鐵佛寺 城東南朱氏橋宋元祐間建乾元寺金哀宗安祖宗御容於此廢

泉陰寺 城西三十里永樂間修此下十一寺俱前代初建

清涼寺 城西南韓莊唐大曆元年建大雲寺天啓年間崇府重修唐賈彥璋薛能有詩

萬壽寺 西關北宋淳化二年建廢

白塔寺 城西南二十里成化間修

楞嚴寺 城西南八里萬曆元年崇府遣中官同僧繼幹募建廢

興龍寺 城西北井口廟弘治間修

老君廟 城西三十里宋崇寧元年建

二郎廟 城西關祀隋嘉州太守趙昱以能除水患故前代建此

荆將軍廟 祀荆軻久廢

二烈祠 祀王基蕭承運死流寇難燬

李太尉廟 城西三十五里一在城西南十三里白馬橋西廢

關壯繆侯廟 西關外嘉靖十五年崇府重建順治六年僧雪雨募修

僊女廟 城西三十里

永照祠 城西南三里萬曆十五年建廢

千佛閣

西關外萬曆十年崇府建廢

醉香菴

城西南三十里秦鎬建南陔左黃輝閣調
美于登瀛彭鯤化俱有題詠

真武廟

西關外今移建路北

十方禪院

西關外僧照本募建義民余輔國張崇
德立會助工陳明韓夢兆各施香火地

觀音閣

城外南湖內寶刹峻嶒琳宮璀璨水雲空
翠蘋蓼迤香四時簷籟襍松篁一曲清波

鋪菡萏兼以古塔僧扉依微西山影裏長堤雄

堞倒蕩南浦光中洵足飽士夫之遊屐快登臨

之逸興汝上水月第一佳觀也嘉靖二十四年

崇莊王禱雨靈應奉勅創建明末後堂僧廊俱

燬順治八年推官王道新建準提樓五楹於舊

址翰林張玄錫碑記

吉祥寺

城外南關有浮屠九級唐武德三年建宋
景祐二年僧吉祥重建明天順元年僧圓

宏重建太守李鏞立碑今存明末兵燬順治十

六年諸生牟璘義民殷守仁李可行張國寧王

國禎等助僧

本潔募建

固城寺

城南八十里隋開皇十六年建

保安寺

城南馬鄉西成化間建

崇真觀

城東關元至大間名玄真觀正德六年崇
府易今名廢

神禹廟

溱濟橋南廢

龍王廟

城南柴潭上金天興三年册柴潭神為護
國靈應王萬曆三十一年知縣王萬祚重

建燬順治七年重修

三義廟 城南三里祀漢昭烈帝關壯繆張桓侯廢

雨花菴 南門外嘉靖二十三年崇府建廢

呂公堂 南關弘治間修廢

黃鶴樓 南湖上萬曆三十三年推官解經雅衛輝推官劉國縉同建廢

金鄉寺 城北金鄉舖西正統年間修

壺僊觀 城北十五里費長房遇仙處相傳有樹高數丈壺公懸壺於上因名懸壺觀唐天

中建宋名壺公祠嘉靖後更今名

三皇廟 北關嘉靖間建廢

牛郎廟 金鄉舖北前代建禱祝其應如響

會同菴 北關外前代建廢

德新菴 東關北河岸順治十年重修

塚墓

漢張邵墓 鷄黍臺西旁一塚世傳為邵母墓

司徒袁安墓 漢汝陽境

平輿令張熹墓 平輿故城東祠地八畝通判何公豁其租

太傅陳蕃墓 平輿故城西南

僊女墓 城西董會邨按異錄記永子仲思母追葬衣冠之所永墓在湖廣孝感縣

宋祖士龍墓 陽安鄉秦少游有詩

元汝陽縣男劉順墓 城東南五里碑存

都督府副使劉文秉墓

順子碑並存

僉都元帥郭恕墓

城東北三十里碑文剥落尚存至元年號

資治少尹都轉運宗得成墓

城西十里

金哀宗陵

奉御絳山收骨瘞汝水傍後翰林學士王鶚請往葬祭至汝水沒具牲酒為位而哭

明崇簡王塚

確山九十里靖恭莊昭諸王同

秀懷王墓

城東北五里

順陽懷莊王墓

上蔡西南五花澗

懷安府莊惠王墓

城東南八里屯

溫穆王墓

同上

瑞安府恭簡王墓

城東南方良屯

莊惠王墓

同上

慶元府榮康王墓

城東南董家邨

端穆王墓

同上

莊懿王墓

同上

歸德府端惠王墓

城西斷濟屯

汝寧知府萬孟雅墓

江西人洪武初任卒葬東關外子孫家焉

知府姚

本墓

大同人景泰間任卒葬鴛鳴池前子孫家焉

知府傅秉文墓

城西三里有桂祥碑記

吏部尚書趙好德墓

洪武十年勅葬城西崔莊喬松翠滴烟雲鬱蔚有碑

工部侍郎趙

毅墓

同上

工部侍郎房

安墓

城東穆家河

兵備劉

紳墓

城西十四里

翰林檢討馬

誠墓

崇府左長史城西十里

翰林檢討梁

翰墓

崇府左長史城西十里

御史張惟恕墓

城東南三里

國子監司業林

時墓

城西十里

吏部尚書趙

賢墓

城西十二里

尚寶司卿羊可立墓

神宗御賜盡忠言事碑城西十五里寨湖

叅政孔惟德墓

城北三里

工部右侍郎桂有根墓

城西十里諭祭葬

吏部尚書莊靖公李宗延墓

城南二十里諭祭營葬

工部侍郎李本固墓

城東五里諭祭葬

兵部尚書莊毅公傅振商墓

城西南八十里諭祭營葬

副總兵徐景星墓

城西十里景星戍浙俘倭數十級累官遼東副帥諭祭葬

劉氏二處女墓

馬鄉六十里

烈士方

瑤墓

城南三里

孝子周永清墓

韓莊四十里

楚士高

雲墓

城西韓莊麻城人教授汝南秦鎬題其墓碣高雲楚士也以舌耕死

徵君秦

鎬墓

城西三十五里南陔之右

武功

周莊王元年乙酉春正月蔡桓侯會諸侯于曹時蔡

先于衛及舉颺晉以祝佗乃長衛

惠王二十一年乙丑春王正月齊桓侯以七國之

師侵蔡蔡潰南至召陵諸侯為蔡謝齊齊歸蔡

繆侯

襄王二十八年丁酉春王正月叔孫得臣以沈服

楚會晉人宋人陳人衛人鄭人伐沈沈潰

匡王元年己酉六月晉大夫郤缺帥師伐蔡戊申入蔡不與新城之盟受城下之盟而還

靈王七年丙申夏鄭子國子耳侵蔡獲司馬公子燮鄭人皆喜惟子產不順曰小國無文德而有武功禍莫大焉晉楚伐鄭弗得寧矣冬楚子囊伐鄭討其侵蔡

敬王十四年乙未夏四月蔡公孫姓帥師滅沈以沈子嘉歸殺之

敬王十四年乙未冬十有一月蔡侯以吳子及楚人戰於柏舉楚師敗績楚囊瓦奔鄭

漢更始元年癸未鍾武侯劉望聚兵汝南上尊號玄帝遣奮威大將軍劉信誅望並其相嚴尤將陳茂盡殺之

建武五年己丑光武遣大司馬吳漢等合兵圍劉永睢陽城中食盡永走鄴諸將追急永將慶吾斬永歸降復汝南二十八城

中平五年戊辰鮑鴻破黃巾於葛陂皇甫嵩破黃
巾於汝南

晉興寧元年癸亥汝南太守朱斌與燕師戰於懸瓠
敗奔壽春

北南宋元嘉二十六年己丑魏師圍懸瓠建立高樓施
弩射城內城內負尸以汲又毀佛置為太鈞施
衝車端以牽樓堞城內沙門多機謀設奇以應
復以蝦蟇車填塹籍尸以登太守陳憲堅壁以

守銳氣愈奮戰士一以當百殺傷萬計汝水塞
流相拒四十餘日魏燒其攻具而還

元嘉二十七年庚寅魏主率眾圍汝南帝遣劉康
祖師次下蔡大破魏軍於懸瓠四十里

真君元年庚辰魏帝斬宋將劉坦之擒程天祚於
汝東

泰始四年戊申魏遣汝陽司馬趙懷仁步騎五百
寇武津龍驤將軍曲元德救之子都公闕於拔

率三百人防運車汝上結營元德單騎斬拔進
攻汝陽臺陷外壘獲車千三百乘百五十級焚
米穀二千車

梁中大通二年庚戌司州刺史陳慶之敗魏師於溱
水

太清元年丁卯牟鴉仁鎮懸瓠魏太傅太行臺侯
景以其城降

承聖元年壬申三月湘東王繹與王僧辯陳霸先
等討侯景景兵大敗率百餘騎東走遣將杜僧
明爲長史仍隨東討軍過蔡州僧明率麾下焚
其水門大艦景尋伏誅

唐建中三年壬戌十二月淮寧軍節度使李希烈自
稱天下都元帥先是希烈平崇義功高兵衆欲
有其地又以李納叛希烈以檢校司空兼淄青
節度使討之擁兵三萬次許昌不進約納陰取
汴州又約河北朱滔田悅等時李納稱齊王朱

滔稱冀王田悅稱魏王遂遣使奉箋希烈號建
興王建和四年癸亥正月陷汝州初盧杞惡真
卿欲出之適上欲遣人宣慰希烈杞曰顏真卿
三朝舊臣忠直剛決名重海內真其人也上以
爲失遣之詔下舉朝失色真卿乘驛至東都留
守鄭叔則曰往必不免空少留須後命真卿曰
君命也將安逃之遂行至許與朱滔等四使同
宴四使曰都統將稱大號而太師適至是天以
宰相賜都統也真卿叱之曰汝知有罵安祿山
而死者顏杲卿乎乃吾兄也吾年八十知守節
而死耳豈受汝曹誘脇乎真卿見希烈宣詔旨
希烈掘坎欲坑之真卿怡然曰死生已定何必
多端悉以一劍相與豈不快公心事耶希烈乃
謝之希烈養子千餘拔刃競進真卿色不變希
烈以身扞麾其衆退乃就館百計誘之從真卿
意持甚堅遂拘送蔡州真卿度必死作遺表墓

誌祭文指寢室西壁下曰此吾殯所也八月希烈寇襄城詔發涇原等道兵救興元元年甲子正月上以陸贄言下詔大赦曰悅李納等見赦令皆去王號惟希烈自恃兵強財富遂據汴卽皇帝位國號大楚遣其將卒景璘謂真卿曰不能屈節當自死積薪灌油於庭真卿趨赴火景遽止之八月會希烈弟希清坐朱泚伏誅悉怒遣中使至蔡州殺真卿中使曰有勅真卿再拜

中使曰今賜卿死真卿曰老臣無狀罪當死不知使者幾日發長安使者曰自大梁來真卿罵曰乃逆賊耳何謂勅耶遂縊殺之時王師屢勝希烈遁據淮西上詔諸道與淮西連接者互各守封疆非被侵軼不須進討李希烈若降當待以不死二年丙寅四月希烈兵勢日蹙縮氣啖牛肉而病部將陳仙竒使醫毒殺之舉衆來降函希烈並妻子七首於京師詔仙竒爲淮西節

度使七月仙奇爲其將少誠所殺復以少誠爲
畱後按希烈燕州遼西人少誠幽州潞人

元和四年己丑秋七月吳少誠病篤不起養弟少
陽自稱彰義節度使畱後朝廷不能制許之九
年甲午閏月少陽死子吳元濟匿喪自領兵稱
畱後據淮西叛十一月以李光顏爲節度使嚴
綬爲招討使督諸道兵討元濟十年乙未三月
宗李師道請赦元濟上不從五月諸軍未討

功遣申慰裴度詣行營宣慰察用兵形勢度還
言淮西可取狀且曰觀諸將李光顏勇而知義
必能立功旣而光顏數破賊上以裴度爲知人
時考功郎中知制誥韓愈亦言淮西小三州殘
弊困劇之餘而當天下之全力其破敗可立而
待然未可知者在陛下斷與不斷爾六月李吉
甫薨悉以兵事委武元衡李師道所養客說師
道曰天子所以銳意誅蔡者元衡贊之也請密

往刺之元衡死則他相不敢主其謀爭勸天子
罷兵矣師道以爲歿資給遣之六月癸卯元衡
昧旦入朝出所居靖安坊東門有賊自暗中殺
之取其顱骨而去又入通化坊擊裴度傷其首
纒帽厚得不死京城大駭或請罷度官以安恒
郛之心帝怒曰若罷度官是奸謀得成朝廷無
復紀綱吾用一人足破二賊乙丑以度爲中書
侍郎同平章事度上言淮西腹心之疾不得不

除且朝廷業已討之兩河藩鎮跋扈者視此爲
高下不可中止上然之悉以用兵事委度討賊
愈急九月以韓弘爲淮西都統弘欲侍賊自重
不願速平遣李光顏美婦人光顏辭曰爲光顏
多謝相公光顏以身許國誓不與賊同戴日月
死無二矣十二年丁酉以太子詹事李愬爲唐
鄧隋節度使討元濟淮西人自以爲常敗高袁
二帥輕愬名位素微遂不爲備愬謀襲蔡表請

益兵詔許以鄜坊步騎二千給之復遣馬少良率十餘騎巡邏獲元濟捉生虞侯丁士良釋而用之爲致死力士良言於愬曰吳秀琳擁三千之衆據文城柵爲賊左臂官軍不敢近以有謀主陳光洽也請先擒之秀琳自降戊申士良擒光洽歸三月秀琳以文城柵三千人降愬慰勞之秀琳將李憲有材勇愬更名曰忠義而用之於是厚待秀琳共謀襲蔡秀琳曰非李祐不可祐有勇畧時守興橋柵素易官軍愬乘其剋麥張柴使庠虞侯史用誠計擒之尋釋縛待以容禮與岳謀畧諸將恐爲變愬益厚之諸將固疑愬乃械祐歸命京師密表釋之尋還愬見之喜甚署爲兵馬使與岳密事是時諸軍討淮西四年不克饋運疲弊民至有以驢耕者上亦病之因問宰相李逢吉等競言師老財竭意欲罷兵裴度獨無言上問之對曰臣請自往督戰誓不

與賊俱生臣觀元濟勢已窘蹙但諸將心不一
不并力迫之故未降爾若臣自詣行營諸將恐
臣奪其功必爭進破賊上悅以度兼彰義節度
使克淮西宣慰招討處置使度請以韓愈爲行
軍司馬陸辭言於帝曰臣若滅賊則朝天有期
賊在則歸闕無日上爲之流涕時愬將攻吳房
克其外城斬千餘級十月李祐言於愬曰蔡之
精兵皆在洄曲守城者皆羸老之卒可以乘虛
只抵其城北賊將聞之元濟已成擒矣愬然之
遣掌書記鄭解白裴度度曰兵非出奇不勝常
侍良圖也愬乃命李忠義李祐帥突騎三千爲
前驅自與監軍將三千爲中軍李進誠將三千
殿其后各軍不知所之但東行六十里夜至張
柴村盡殺其戍卒及烽子據其柵命士卒休息
食乾糧整羈勒畱五百人鎮之以斷朗山救兵
又分兵以斷洄曲及諸道橋梁復引諸將兵夜

半雪愈甚行七十里至蔡城近城有鵝鴨池愨令驚之以混軍聲自少誠拒命官軍不至城下者三十餘年蔡不爲備愨四鼓至城下無一人知者李祐李忠義鑿其城爲坎先登壯士從之殺門卒而留擊柝者使擊如故遂開門納衆鵝鴨雪止愨入居元濟外宅或告元濟曰官軍至矣元濟尚寢笑曰俘囚爲盜耳曉當盡殺之又

有告者曰城陷矣元濟起聽於庭聞愨軍號令曰常侍傳語近萬人始愨曰何等常侍能至此乃師左右登牙城拒戰時董重質擁兵萬人據回曲愨曰元濟望者重質之救耳因訪重質家厚撫之遣其子傳道持書諭重質重質單騎詣愨降攻牙城燒其南門民爭負薪芻助之元濟城上請罪執之檻送京師不戮一人愨復屯於鞠塲以待裴度度入城愨具橐韃出迎拜於路左度將避之愨曰蔡人頑悖不識上下之分數

十年願公因而示之使知朝廷之尊度乃受之
愬還軍文城諸將請曰始公敗於朗山而不憂
勝於吳房而不取冒大風盛雪而不止孤軍深
入而不思然卒以成功衆人所不諭也敢問其
故愬曰朗山不利則賊輕我不爲備矣取吳房
則其衆奔蔡併力固守故存之以分其兵風雪
陰晦則烽火不接不知吾至孤軍深入則人皆
致死戰自倍矣夫視遠者不顧近慮大者不計
細若務小勝恤小敗先自撓矣何暇立功乎
皆服裴度以蔡卒爲牙兵或諫曰蔡人反側尚
多不可不備度笑曰吾爲彰義節度使元惡旣
擒蔡人則吾人也又何疑焉蔡人聞之感泣先
是吳氏父子阻兵禁人偶語於塗夜不燃燭有
以酒食相遇從者罪死度旣視事下令惟禁盜
賊聞殺餘皆不問往來者不限晝夜蔡人始知
有生民之樂十二月上御門受俘斬吳元濟賜

裴度爵晉國公復入知政事李愬爵檢校尚書
左僕射山南東道節度使封涼國公諸將李光
顏以下各封賞如功

廣明元年庚子黃巢渡淮節度使薛能遣秦宗權
寇軍淮西宗權據蔡叛巢走出關宗權與連和
圍陳州巢死宗權嘯聚連殘大肆吞噬遣弟宗
吉等攻陷壽州等處關中青齊及荆郢衛滑南
北相距千里宗州合光啓元年乙巳宗權僭號

稱帝文德元年戊申以朱全忠爲蔡州行營都
統討之合諸鎮兵分爲五軍入其地宗權索壁
不出以扼險要全忠拔壁傳城而壘以羸兵誘
賊出戰大敗克其外城龍紀元年巳酉十一月
宗權被愛將申叢執之檻送京師并其妻趙斬
獨柳下

宋建炎二年戊申金陷蔡州執守臣閻季思因遷其
民於河北四年庚戌知州程昌寓棄城南奔紹

興元年辛亥鎮撫使范福復棄城去以土豪李佑代之六年丙辰少保河南北招討使岳飛克復之十年庚申岳復敗金於州復其城七月班師城復陷

寶慶六年癸巳史嵩之命孟珙等帥師二萬運米三十萬石赴元那顏僭盞約圍金人於蔡金人出戰珙遮其歸路擒偏禪十有七人得降人言城中饑甚珙曰窘矣因與僭盞約南北軍勿相

犯丙子黎明珙大戰立柵柴潭上命諸將張億等決柴潭拔其樓俘將士五百三十七人元人復決練江是以兩軍皆濟攻其外城巳卯大破之進逼土門金人驅其老稚作人油砲慘毒巳極珙遣道士以計止之巳丑合兵攻西城城墮金將忽斜虎摘三面精銳日夕戰禦乙未金主殺廐馬五十七匹民馬百五十四匹犒賞將士珙見黑雲壓城日色無光且降者言城內糧絕三

月乃下令諸軍啣枚布雲梯攻之時端平元年
甲午金主守緒集百官傳位於東面元帥承麟
瑛師已至南門金字樓揚鼓爲令號招先登者
馬義趙榮祖繼之全軍競進烏古論鎬率其將
士二百餘悉降承麟方受卽位禮賀而南城已
樹宋幟矣守者棄門走瑛率江海及那顏等三
入忽斜虎帥兵巷戰不敵守緒知其事危取寶
玉置幽蘭軒環之因草命近侍曰死卽此

自經忽斜虎曰吾君已崩吾何以戰爲言訖赴
水以死諸將士皆曰相公能死吾輩獨不能耶
於是參政及軍士百餘人皆從死焉江海入宮
獲金參政張天綱承麟亦爲亂兵所殺

元至正三年癸未陳州棒胡奉彌勒佛逞妖言惑衆
煽亂寇歸德焚陳州屯杏岡命河南行省左丞
慶童討之己丑汝寧獻所獲彌勒小佛僞宣勅
并紫金印量天尺

至正十一年辛卯五月潁州妖人劉福通作亂紅
巾爲號陷潁州據朱臯破真陽羅確等縣復陷
汝陽衆至十萬先是樂城韓山童祖父以白蓮
會燒香惑衆河南江淮愚民翕然信之福通以
妖言同起作亂事覺縣官捕之急遂反山童就
擒妻楊氏子韓林兒逃之武安於是汝潁之間
妖寇羣起俱以紅巾爲號脫脫奏以御史大夫
也先帖木兒知樞密院將諸衛兵十萬餘同老
章復汝蔡擒韓咬兒等旣而也先帖木兒駐兵
沙河軍中夜驚盡棄軍資器械北奔汴梁十二
年壬辰順帝詔太不花爲河南行省平章政事
將兵往伏老章汝南遂平十五年乙未二月福
通等迎立韓林兒爲小明王國號宋二十三年
癸卯正月張士誠將呂珍襲殺福通韓林兒亡
明正德六年辛未春霸賊劉六齊彥明等渡河經汴
由汝肆掠江淮屠戮州縣數萬蜂擁如入無人

是歲秋支黨趙鏐等復過河陷太和沈丘等縣南掠汝陽陷上蔡知縣霍恩死陷西平知縣王佐死坐困屠洗烏獸駭竄知府畢昭僉事王玄治兵守城時大同指揮汪淵援汝分兵舉擊賊黨賈晃兒等回兵攻朗陵守備余煥帥師禦之衆潰瑛僅以身免義勇士方瑤力戰死之時偏頭關都指揮周鏞指揮裴重連弘農都指揮王璽彰德都指揮張弘合兵戰賊於霸王臺

賊遂次汝陽先是河南巡撫鄧璋累疏請兵七年春上始命副都御史彭澤咸寧伯仇鉞統摠兵官馮禎時源等以寧夏延綏遼東三路兵討之三月大戰賊敗乘勝進力追殺斬俘數萬人獲馬畜寶貨婦女各千餘計賊奔洛水馮禎力戰死之賊復肆威薄汝陽立馬雙橋窺城守備嚴皆遁去彭澤駐兵汝上節制諸軍分師夾勦擒賊首趙鏐兄弟陳漢等二十七人送京師伏

誅

萬曆八年甲申大盜史世華數百千人分劫大河
南北世華歸汝之寒莊守備熊世錦偵知之夜
馳騎往擒世華覺登樓執一老嫗爲遮箭具旣
而從門隙下視世錦飛矢穿賊左睚賊頰首泣
下曰今果遇熊猴矣遂就縛下有司獄羣賊聚
謀劫熊旋會當事斃世華黨散解去世錦官副
總兵

天啓元年辛酉八月沈潁土賊韓應龍聚衆謀叛
東南道絕行人焚殺日十數舉知縣楊文昌計
捕緝之遂獲應龍請諸上台斬於教場懸級城
上曉示時取東南圮塔輓瓮月城以備不虞
崇禎六年癸酉十月二十日流寇自山陝渡河蔓
延中州分營四十八長驅劫擄如入無人時府
州邑聞警汝寧知府黃公元功知縣姚公士恒
入覲署印推官于公重華署縣同知劉公附鳳

嚴訪城守分派訊地鄉官大理卿彭公鯤化守
南門大司馬傅公振商守北門布政吳公愈守
西門同知劉公附鳳守東門各門分佐貳官一
員晝夜督理之舉人監生員分派角樓警舖
巡查塚夫有警每塚一燈一夫無警十塚一燈
五塚一夫四關操練鄉勇以王基蕭承運克西
關團練千總張惟敬劉合之克東關團練千總
兼巡緝南北兩關盤結奸細日事操演備有調

度十二月雪夜有老回回孫昂可天飛沙來鳳
至確山挨山經過不敢犯汝至新安店扎營一
路焚劫殺擄南下七年甲戌春正月土賊五百
餘人持刀躍馬只抵西堤謀劫關廟守備劉宗
堯襲破之秋七月八大王張獻忠抬營至馬鄉
燒毀村店擄殺男婦無算闖塌天駐寒凍店焚
殺慘甚生員梁日壯兄弟死之冬十月老回回
合掃地王聞人訓合營駐扈家店塘馬哨卒掠

射橋萬金店朱湖一帶十餘晝夜村野盡空時
百姓結衆修砦相守猶戀鄉村十二月土寇盛
自友稱兵據岳城沈萬登稱順義王白太徵吳
太宇各稱長盤子擁衆抬營分掠省郡土賊日
熾矣八年乙亥春正月初四日辰時闖塌天合
混十萬姜兼塘馬抵城外千總王基蕭承運統
鄉兵戰於西教場賊衆不支基連殺二賊中矢
而死承運力救亦被殺復掠南關城守千總劉

夢星率鄉勇劉振武等以強弩中賊賊遂合營
攻東關燒房屋萬餘架火延半月尚燃南北大
商劫殺殆盡男女被傷以萬計生員溫胤厲妻
韓氏不屈大罵被戮是夜賊東下焚擄楊埠瓦
店諸處破穎州尚書張鶴鳴死之支黨追頭目
正營至北關傅司馬以神鎗從城下擊之轉犯
東關皆蠶食餘矣又招姚家灣鄉勇千餘接戰
賊遁次辰生員張沃擒紅甲賊數人解至城下

斬之後二日賊過天星周清萬餘衆自南會汝
駐營萬家店傅又遣把總劉舜鄉張三奇統鄉
勇夜劫賊營潰亂而走三月遊擊陳永福南援
駐汝九月初蠶子快梅遇春東掠逕東關千總
張維敬數戰數勝後精騎擁至維敬被砍馬下
賊剖顱空腦而去司李于公重華哭祭之是夜
屯營王岡坐困屠洗又支黨南寇是日大風捲
沙日色皆赤副將張委其後令鄉導引至馬
賊已拔營南去留數騎賫金帛誘之回知縣秦
公廷奏厲詰之張遂拔營入朗時千金劉掠廟
兒灣闖賊李自成掠火燒店一斗穀鄭曰仁掠
馬鄉土賊張五平乘機劫殺村墟無烟民多逃
亡田土荒蕪鄉農移居城內饑民聚以爲盜無
虛日矣九年丙子春陝西平涼軍門統總兵尤
世勳全軍勦撫駐汝檄江北川陝河南鄖襄諸
郡選嚮道壯丁送軍前備練以圖大創卒調去

四月督撫王家禎師次汝上總兵左良玉以征
舞陽楊四功休兵於汝月餘南下秋八月斬土
賊丘二毛鄭和軒十月初九過天星寇官莊把
總張三奇力戰賊願款奇不聽後全營齊至奇
被殺碎其尸長子生員鞏國次鞏祥婿吳恩全
家俎醢冬十月混十萬復寇東關焚河下商舡
火光十餘里東關四市盡成灰燼十一月翻江
龍呂佐掠白堰一條龍馬元龍掠火燒店宋家
店曹操王林漢掠金鄉店射橋土賊阮德軒焚
廟兒灣秦家店等處鎮店丘墟村落蒿萊春饑
夏疫秋潦冬旱連歲踵至時捕盜通判孔貞會
見土賊蜂起日難撲滅給劄付封千總術任羈
縻以招爲奇張五平郭三海侯鷺鷺陳爾學盛
顯祖等揭竿操戈焚殺淫占幅幘千里歲無寧
日田非至有民多背井鉤黨投營盡棄本業十
年丁丑春巡按楊繩武按汝檄西平都司劉洪

起領鄉勇緝獲張五平侯鷺鷥誅之其餘不服者復檄陳州衛軍士攻勦獲郭三海於平頭塚檄遊擊朱榮祖引兵燒陳爾學於寒莊破盛顯祖救回婦女數千賊黨不悛欲刈四野麥以斃城內知府李公燦與鄉官傅公振商秘計授榮祖賺賊首殷守祖等五十餘人入城領受封賞引入城隍廟盡殺之時一斗穀冠廟兒灣格子眼盛永正寇火燒宋家二店一月凡四次東南之境竟成戰場齒骼連野鬼燐晝見冬十一月太府盧九德領兵駐汝明年二月西入洛陽十一年戊寅賊闖塌天駐營寒凍寨主馮玄之統鄉勇力戰玄之兄弟被殺廩生李梅先趙純趙朴李甲被執梅先不屈罵死之洪太太洪用光寇楊埠舉人王調鼎死之十二年己卯春新三營黃將降順駐南關搶擄百姓以實營伍五月賊盤據南陽鄧州等處督師熊文燦統兵分駐

城內外蹂躪搜索苦楚萬狀崇王欲疏劾之尋
移營去秋七月沈萬登招安安插真陽十三年
庚辰郭內傅三勾北灣土寇趙維現等陰謀詐
城夥黨馬二出首令朱榮祖星夜捕擒獲傅三
陳政等斬之穢悉降時總兵黃得功劉花馬兵
駐汝九月一條棍由城西分隊南掠駐三橋葛
陂屠牛椎馬慘毒尤甚次日有鄉勇夜俘其級
來獻者時百姓近者寨居遠者廟棲携男抱女
草中露中泥中者非月日計十四年辛巳春都
督丁啓睿同總兵左良玉領兵駐汝保督楊公
文岳奉旨防汝城門緊閉不啓兵馬連騎破寨
掠村鷄犬糧石負駝轉貨城內時降賊白太徵
糾衆結營抵城殺兵復讐城內戒嚴列門懸燈
密防奸細城上每梁一夫燃燈兩兵擊柝及晨
復讐之民爲兵殺者大半兵勢益肆拆寺廟燬
庄房伐樹木四野皆赤土荒草矣秋七月火攻

車子軍參將楊昞駐汝總兵虎大威與賊任瞎子小袁營袁時中戰於楊埠賊敗奔逃救回婦女四百餘名收汝空署令其親識投認大威尋以攻寨中鉛回死於雨花菴部下兵馬二鼓噪去城內守兵皆養於士民家尋出之冬十月總兵黃得功劉花馬左良玉十七營駐汝左兵索糧本色欲奪門以進士夫義倡每戶礮麵以供晝夜間男女負袋登城繹絡不絕次辰麵如山堆道路如雪者指許左拔營去知縣劉公顯績謝於庠壯之九月楊文岳丁啓睿奉調援汴至汴已被水陷與闖賊戰於朱僊鎮左師先走丁楊二師大敗監軍道任棟陷於陣隨收兵還汝十五年壬午夏四月文岳待罪防汝獲立賊白太微檄巡道王世琮斬於大街秋九月初三日文岳調南陽時闖賊破楊埠復破荆王二寨總督傅宗龍廬戰二十餘日賊衆執傅抵項賺城

傅大叫曰城內皆吾赤子此賊耳非官兵也遂亂刀砍傅死項人收其屍殮於大吉寺哭祭之格子眼掠南關知府傅汝爲率北帳趙發吾等敗之去十月文岳還汝兵不滿三千巡道王世琮調川營參將王希甲湖廣副將溫良玉趙國聘兵約萬餘適格子眼由汝往北趕闖將入陝及見闖言汝兵馬甚衆闖遂率兵飛騎晝夜南下時塘馬賈都司偵知其故回報文岳卽出示

曉諭三軍今日之役可戰可守相機而行成敗勿論惟一死以報朝廷是夜二鼓賈卽率部下馬步千餘噪去時閏十一月初十日也十二日晚賊哨至北關離城三十里已合圍安塘矣十三日賊列營四面攻圍大風涼烈日色慘黯東關監軍道孔貞會全軍先潰繼城而上文岳督馮副將戰於窰場賊安砲堤上擊開南關營柵軍士投濠死者無筭賊猶以鎗刃之濠水盡赤

馮將自刎文岳仗劍躍馬嬰城自守時勢蒼黃
人無鬪志西關王叅將北關趙副將猶死戰至
二鼓賊勢愈熾兩將自焚營柵統部下入月城
砍馬自刎從者千餘人是夜賊砲響震天地樓
瓦墜磚盡傾裂填濠成橋飛步雲梯十四日晨
有串崇中貴假王旨議降告文岳文岳大怒舉
刀砍柱厲聲曰有敢言降者刃之各官皆散去
至午賊自西北門入城執文岳壁立不屈闖曰

先生朝廷重臣自不當屈何不知時勢乃爾耶
文岳正色曰朝廷洪福無疆但恨部下不得天
下兵馬耳闖領之偏將引別所計誘降不從遂
殺三里店三義廟前立牌書街以誌巡道王世
琮通判朱國寶同死知府傅汝爲投河知縣文
師頤亦死崇王及世子繫馬上難民回傳聞至
泌陽殺之監軍道孔貞會尚在營十六日東寨
韓華美携輜重眷口投降闖給令箭錦衣大馬

封威武將軍守汝時聞左師在襄二十日拔營
趕左北帳土賊趙發吾等進城窰地穿壁搜求
無遺老幼婦女並擄去同知韓公燿署遂平走
嶂岬山得免於十二月初十日收復地方調西
南鄉兵劉洪禮沈萬登守城逃難士民潛匿鄉
村者始敢入城先是闖賊入城檄五營四哨標
前後左右簡百姓羸老者殺幼稚者火精壯者
收以益兵城內止餘老幼婦女百人內不見一
男子屠戮生靈潘穢天地房廬焚毀疆屍遍野
難民中有衣紙者有被皮者覆草者屢敗絮者
宛如鄴都狀韓公出崇國積錢每諸生賑給一
千民或五百三百不等隨挨戶察被難姓名及
一時營中得目覩者千戶劉懋勛袁永基楊紹
祖皆死之百戶葉榮蔭守南門死張承德守西
門死李衍壽關忠國守柵死遊擊朱永祖與妻
俱焚一時被害者監生楊道臨黃鼎雲貢士林

景暘生員趙重明費明棟楊應禎楊應祥吳琇
李璣楊鏞張經訓馬獻書李士諤負母求脫被
及者郭正諤罵賊殺死者監生趙得庚生員胡
瑞馬駿婦女被害者大理卿李本固再室曾氏
布政石檜側室熊氏諸生羊三桂妻石氏貢生
李士純妻傅氏李孕琦妻陳氏縊死者孔門彥
母郭氏妻田氏投水未得被害者孔門哲妻熊
氏哲女二姐桂澄妻熊氏罵賊死者沈

胡氏沈易經妻沈氏女感姐瑞姐蘭姐投井死
者張孔緒妻徐氏逼從不屈殺死庭內者生員
胡琦女祿姐四姐列以待表十六年癸未春大
亂後大疫死者無數夏四月闖賊進稱文武大
元帥襄陽置帥府大建官員選偽防禦使金有
章偽府尹鄧璉偽推官鄒應麟偽縣令樊仲表
檄至偽威武將軍韓萃美率衙隸役迎接到任
巡道韓公署縣事朱公避去偽至果毅將軍白

九鶴統軍護送都尉一員侯玉鳳長旅四員分
守四門巡鑼站對有章建牙懸纛鳴金放炮殺
戮無虛日征求無停晷此時沈萬登謀偽之心
已決陽順陰逆觀望舉動八月馬尚志受偽威
武將軍印蘓青山受偽長旅職韓華美鎮守信
陽囚官虐民以自快九月內韓公檄萬登捕偽
萬登計令鄉勇於二十四夜二鼓作土寇博城
狀誘之有章疑想令萬登部下孫玉成等守城
有章出巡真陽萬登就擒之十月初一日秘諭
孫玉成等以紅甲長鎗爲號遂捉偽官鄧璉等
復擒馬尚志碎其尸汝人啖其肉以稱快初四
日韓公至百姓焚香跪道痛哭迎接隨以萬登
鎮汝明年甲申沈中軍王民表殺西平副將劉
洪起弟洪勛攫其財事泄洪起稱兵復讐先揭
榜通示以白其意韓公知事不可挽同推官伍
三秀去固始四月初一日洪起調郭黃臉金臯

趙發吾諸寨調村佃率部下丁圍城二十日百姓先殺牛驢次樞草根有食瓦松者食麩麩者糜人而食者饑死大半麥枯於野屍遍於市漳德司理朱明得北都信耗南奔過汝爲劉沈議和沈不聽五月初一日城破大肆焚劫殺掠無數獲沈萬登並孫玉成陳四諸人碎剛於三里店時洪起爲左鎮副將連絡四方村砦南至楚穎北至大河寨營望風而歸韓萃美又棄僞投

洪起洪起復令守汝六月初一日闖右翼權將軍袁宗第聞洪起破汝自德安星夜奔汝捉洪起萃美出迎笞捶幾斃袁據城五日入陝去九月洪起入湖廣詣左師回所捉南陽開封州縣僞官解送南都參謀牛國寶建帥府置儀衛洪起受監國勅印稱總鎮加官保州縣正印聽其委授明年乙酉二月出兵新息等縣檄南北營頭寨主議修黃楊鷄公平頭等寨以屯軍閏六

月

國朝摠鎮孔希貴奉檄招撫洪起走據平頭塚清兵
攻圍中流矢死知府線公縉知縣楊公義招撫
流移解散營寨遂大定

藝文

詩 歌 贊 銘

鴻郟陂

漢童 謠

壞陂誰翟子威飯我豆食芋魁反乎覆陂當復誰
云者兩黃鵠

百一詩

魏應 璩

下流不可處君子慎厥初名高不宿著易用受侵
誣前者隳官去有人適我閭田家無所有酌醴焚
枯魚問我何功德三人承明廬所占於此土是謂

仁智居文章不經國筐篋無尺書用等稱才學往
往見歎譽避席跪自陳賤子實空虛宋人遇周客
慙愧靡所如

從征行方頭山

晉袁宏

峩峩太行凌虛抗勢天嶺交氣窈然無際澄流入
神玄谷應契四象悟心幽人來憇

詠史

周昌梗槩臣詞達不為訥汲黯社稷功棟梁天表
骨陸賈厭解紛時與酒檮杌婉轉將相門一言和
平勃趨舍各有之俱令道不沒

畱贈山中隱士

梁周弘讓

行行訪名嶽處處必畱連遂至一巖裏灌木上叅
天忽見茅茨屋曖曖有人煙一士開門出一士呼
我前相看不道姓焉知隱與僊

方杖竹堂歌

後魏高祖

高祖曰日月光天無不曜江左一隅獨未照彭城

王勰歌曰願從聖明兮登衡會萬國同兮混江外
 鄭懿歌曰雲雷大震兮天門闢率土來賓一正歷
 那巒歌曰舜舞干戚兮天下歸文德遠被莫不思
 道昭歌曰皇風一鼓兮九地匝載日依天清六合
 高祖又歌曰遵彼汝墳兮昔化貞未若今日道風
 明宋升歌曰文王政教兮暉江沼寧知大化光四
 表

上裴晉國公

唐趙 嘏

四朝憂國鬢成絲龍馬精神海鶴姿天上玉書傳
 詔夜嘩前金甲受降時曾經庾亮三秋月下盡羊
 曇一局棋惆悵舊堂扁綠野夕陽無限鳥飛遲

中書郎事

裴 度

有意效承平無功荅聖明灰心緣忍事霜鬢爲論
 兵道直心還在恩深命轉輕鹽梅非擬議葵藿是
 平生白日常懸照蒼蠅漫發聲嵩陽舊田里終使
 謝歸耕

平蔡州

權德輿

汝南晨雞喔喔鳴城頭鼓角音和平路傍老人憶
舊事相與感激皆淚零老人收淚前致詞官軍入
城人不知忽驚元和十二載重見天寶太平時

讀淮西碑

李商隱

元和天子神武姿彼何人哉軒與義誓將上雪列
聖耻坐法宮中朝四譯淮西有賊五十載封狼生
貆貙生羆不據山河據平地長戈利牙日可磨帝

得聖相相曰度賊斫不死神扶持腰懸相印作都
統陰風慘淡天王旗愬武古通作牙爪儀曹外郎
載筆隨行軍司馬知且勇十四萬聚猶虎貔入蔡
縛賊獻太廟功莫與讓恩不訾帝曰汝度功第一
汝從事愈宜爲辭愈拜稽首蹈且舞金石刻畫臣
能爲古今世稱大手筆此事不繫于職司當仁自
古有不讓言訖屢領天子願公退齋戒坐小閣濡
染大筆何淋漓點竄堯典舜典字塗民清廟生民

詩文成破體書在紙清晨再拜鋪丹墀表曰臣愈
昧死上詠神聖功書之碑碑高三丈字如斗負以
靈龜蟠以螭句奇語重喻者少讒之天子言其私
長繩百尺拽碑倒麤沙大石相磨治公之斯文若
元氣先時已入人肝脾湯盤孔鼎有述作今無其
器存其辭嗚呼聖皇及聖相相與烜赫流淳熙公
之斯文不示後曷與三五相攀追願書萬本誦萬
過口角流沫右手舐傳之七十有三代以為封禪

玉檢明堂基

讀淮西碑

宋蘇軾

淮西功業冠吾唐吏部文章日月光千載斷碑人
膾炙不知世有段文昌

古城

元馬祖常

自愛屋南芳樹林一朝暑雨翠沉沉地清豈知無
棲鳳燼合時復有鳴禽讀書艸堂生曙彩望野古
城畱夕陰莫道楚鄉風物隔文章屈宋到如今

吉祥寺

吳萊

一夕逢寒食行陰採物華風生獻檻竹雨濕墮船
花曲塢青龍樹長灘白鷺沙回看湖水上直去到
君家

偶咏桃臺

明趙毅 郡人

玉真僊子晏桃臺星眼朦朧醉半開五色雲隨春
樹簇千章錦對夕陽裁却將太乙宮前景移入玄
都觀裏來劉阮不須尋捷徑汝南城外是天臺

咏葛陂

誰把僊人九節杖等閑持贈葛玄翁騎遊八極煙
霞表歷覽三清境界中紫府歸來携雨至蒼龍化
去有雲從汝南千載遺陂上日月風雷浪几重

登蒼臺

王槃 尚書廬陵

高臺窈兀接荒城風雨年年蒼草生鳳尾飄蕭雲
氣濕龍頭天矯露華清重障此日升雙闕一本何
時滿百莖安得神龜常守護靈根直擬獻承明

眺洪河

馬蕙教諭

河流百折綠縈紆况復春深雨更餘
片片落花輕泛水依依碧荇暗藏魚
磯頭沙鳥來還去天際風帆卷復舒
獨爾問津見漁叟蓑衣來自武陵居

遊北泉

林時郡人

獨臥懷西野群行望地泉斷橋防馬度
峭壁咤龍懸楓落三秋雨秔香九月天
結廬如可遂捫石縱高眠

其二

星河臨戶動鷄犬抱雲棲短燭燒仍替
疎鐘聽不迷堂深稀俗響榻下費詩題
平旦尋經路西風送馬蹄

登桃臺

錢鉞太守
武林

憑空誰築此高臺歲歲桃花面面開
暖借春陽成舊約紅於蜀錦出新裁
騰霄僊子陵霞遠吟賞詩人載酒來
我欲乘軒馳夜望太平有象屬三臺

題劉清廬壁

李丕顯 太守

北郊碧艸蔓荒丘腸斷西風負土秋
烏鳥啼來兩行淚白雲飛處四時愁

坐嘯亭讀書作

徐中行 太守 吳興

經僻青蘿合亭空白日長癖難忘
左氏狂頗似東方身漸風塵老
名差案牘強平生喜坐嘯不是學
南陽

同僚友宴集表台

表臺高出頰儒林叅佐乘春此盍簪
自得范滂惟盡譜不妨牟祐數登臨
嵩山近接真人氣汝水深知傲吏心
倒著接籬從容笑使君今已二毛侵

瑞麟圖贊

天官大角肇自軒皇振振仁戡載見
成康恭惟今上聖德當陽中興化洽
彌熾而昌天降瑞麟于我豫方豫方
維何圖書舊鄉嵩洛孕秀風氣允臧
猷歲仲春日時孔良雷電交作雲霧
飛揚是生神物

厥兆異常一以為惟一以為祥倏忽變幻若見若
藏譬彼景星暫爾為章如可羈縻曷殊犬羊維龙
維鹿克于明堂爾維靈首胡遯于荒言念西狩掩
袂心傷爾身彌困爾瑞彌彰勒之金石炳赫無疆

登觀音閣

張四知 邑人

香閣峻嶒俯遠坳冬深極目思泠泠磬傳下界時
能響龕近諸天晝亦冥朗岳欲啣殘照赤岱宗逢
捲片雲青禪心共為恣幽賞徒倚珠林夕未停

北郊憶昔

羊可立 郡人

竹林遙望見青山人在艸香松影間地主不知何
處去悠悠一鳥自飛還

南湖舟子

晝夜船頭立春秋水上浮饑寒渾不畏端的是僊
流

天中書院銘

樂和聲 知縣 嘉興

維汝之陽維天則中逝者如斯性孰不恒自南自

北自西自東川途萬軫伊離于宗凡天之生孰減
孰豐馳而不止乃盭厥衷恠遷頗僻蚩蚩夢夢覺
則不先匪我求童振鐸警聾廼揖斯宮孰成而毀
吾道則窮雖毀勿毀孰併而懞實天之爲非人能
功曰茲肯構偶適其逢廊廡秩秩棟宇薨薨衿縫
濟濟絃誦雍雍言升其堂於穆聖容實修實正美
墻若通開也能信寧俱其蒙几我友生實踐斯蹤
不腆之賦用佐殮饗司會司餉有司是供無傷新

米以永磨礪願言千禩道化是醜敢告來者克成
厥終

別汝南諸父老

憶昨分符懸瓠城澤中鴻鴈亂飛鳴誓將流徙仍
妻子力分狂湍走饑耕浪說五年消犬吹却笑一
縣出花迎臨岐擁輒西風別愧我慇懃父老情

別汝南諸薦紳

漫說汝南名月且直看淮北是天中五人必子師

單父數載山陰狂聖通壺市烟縈鷺鳴柳鴛湖夜
夢鳳凰桐故人一別如相憶尺鯉無忘江水東

憫滂有作

王萬祚 知縣天台

汝連淮潁地寬平杼軸聲稀傭懶耕鴉鳴浪煩唐
計較鳳凰空竊漢虛名隄防蟻穴愁飄稼水窄龜
肩欲病城莫道井田言謬濶沉思此地可徐行

題鷄黍祠

鷄黍祠臨官道傍石碑高處草生香往來南北饒

車馬愧殺翻雲覆雨郎

謁徵君祠

高竹依清流不見黃叔度西風吹角巾扁舟二人
渡

南湖秋泛

黃似華 太守蜀中

十畝城南地清流匯作湖王孫開別業冠蓋任前
驅隔岸浮青嶂迎門長綠蒲超然塵壤外何處覓
蓬壺

臺榭鰲應戴波光天欲沉依微三島景俯仰百年
心水鳥依叢莽城烏下夕陰劃然鐘磬發隔水是
祇林

登鼓角樓

李宗延 邑人

懸瓠危樓出凭欄萬井平雲霄威鳳翥風雨臥龍
鳴朗岫窺簷色河流入座聲冥氛靈氣合望藹太
墟城

鼓角樓讌集

李本固 郡人

峻嶒巍閣起中天夏日登臨更爽然萬井風烟憑
檻外千山嵐翠把杯前高懷已下陳公榻秀句兼
裁郢客篇正是太平閒鼓角何妨清夜共流連

寄汝南紳士

黃 煒 副使
南克

一別瓠城三十年南湖秋月夢依然歲無恙也民
無恙誰念山翁枕石眠

其二

長林野鶴自躡躑子和孫鳴伴野禪爲愛故人詩

句好因憐平倩轉潛朕

汝南張五店獻白兔詩

彭鯤化

邑人

卯宮上界宿居房忽自瑤臺降下方應與鳳麟同
瑞世好將囿苑並稱梁舐毫口吐藍田玉擣藥身
沾素杵霜自是化成俗美日兔豈重繼國風章

其二

太陰皓質臥銀床濯魄僊壺汝水陽堪向雪宮分
夜色還將月賦闕秋光毫成白筆彩呈色衣比素

娥淡作粧二十年前曾產蔡重來化境獻奇祥

柴潭龍祠祈雨

傅振商

郡人

碧潭歛灑影沉沉故有蟠龍發曉陰照日含珠呈
寶氣排雲神力霈甘霖水迴窟底琳宮壯霧擁林
隈古廟陰節序村翁巖伏臘寧無靈雨蕪流金

舊巖聞友人秦京徵書至喜而賦此

徵書璀璨似驚鸞喜溢重彈貢禹冠捧檄歲君修
鳳翥借山笑我學龍蟠白雲幻作卿雲麗世路何

如賢路寬漫擊唾壺頻勸駕少微紫氣映長安

鵝池春雪

鵝池春雪接河千十萬人家臥曉寒不是將軍留
馬跡遊人爭得回圖看

西湖秋月

翠光亭畔縹烟蘿爭攬銀蟾綴素波待月臺空人
已去湖光如鏡照霜娥

桃臺晚霞

桃花如醉艷芳春麗日霞光照錦茵紅雨林邊成
獨往武陵咫尺有幽人

僊橋夕照

二季莊邊跡已陳黃姑解佩舊河津年年七夕通
靈會曾憶橋邊合邈人

送黃伯謙守汝南

劉榮嗣

尚書
曲周

地入天中天較寬自吹鄒律不知寒羣峯入座青
堪賞修竹經冬秀可餐月旦何人追許邵雪朝將

子至袁安憐才第一邦君事况復君家室有蘭

其二

山水先知到日清還堪紫馬路人迎別心在詠春
依草幽事驚心陌有鶯終惠民相忘道術不言神
亦聽和平樂公風築真如此今古猶多愛士聲

過汝南別墅

汪逸 徽州

身從筠閣俯桐關目亂蒼藤翠石間田自雨漂金
數沼塔纔烟鎖併沈山禽魚野客情相近酒脯因

丁職未閒同醉此中君獨遠倚欄惆悵不能還

康家店卽景

張宿次 邑人

荒店岡頭草徑微郊原門巷杏初肥村童指點南
陔路綠樹青山白板扉

夏日荆河

秦鎬 邑人

幽事偏東郭孤筇引興賒兩岐豐漢麥五色瑞秦
瓜老葛纏邨古支流寫岸斜因逢熊處士畱滯過
昏鴉

南湖

勝地非無至繁陰許借涼鏡開閣飛動天入樹青
蒼隔岸傳干曲分流磬一觴沙鷗誰慣汝飽泛白
蓮香

金鄉道中

鵝鴨池邊汝水長人家高下跌層岡瓦飄廢觀蹲
雙獸石削危橋臥半羊小埕有靈仍測影殘碑無
恙獨撐霜西風匹馬金鄉道落日雷詩吊范張

白兔詩為黃郡公仲質作

寒日三山盡深焮萬卉枯霜風催上蔡露液灑平
蕪蕭蕭且於野爰爰兔在隅入眸驚罕絕落手詫
稀無宿莽微雲抱遙岡片日扶白乎寧受涅清矣
未容污可是濤凝魄應為雪浸膚奔疑珠亂綴臥
想玉斜鋪黃犬虛相憶蒼鷹枉自呼僊娥輝乍滅
郢客翰無孤巖際渾猜石沙邊祗類鳧光堪齊越
雉色豈儷秦狐持以將熊軾雷之配虎符瑩瑩遊

水鏡皎皎落水壺紀筭占毛毳微休驗斗樞還同
黃霸事錫賚下天衢

奉檄勘水抵韓莊同黃伯謙郡公宿南陔次韻

蔣燦蔡令
蕪州

煩襟不可滌言訪高人廬未暇窮與突望衡氣已
舒猶恐岸谷邃武接翻踟躕披帷一笑見寒髭暖
欲噓回睇廊廡間松篁正森疎碧蘿四圍合飛英
落不除池心月忽到冷浸玉蟾蜍意愜動成靜玄

對疑太初談餘出卮酒薦七有嘉蔬飲牛呼墨卿
興到我獨書為歡夜忽旦清境難久居我去君還
坐苦樂終何如

王粲遺宅

清陳聯璧副使
襄陽

建安七子獨雄才公讌從軍藻思開遙憶當年淪
落日登樓幾度賦歸來

平輿名勝

沈國遺踪激水西杏花歷亂鳥空啼回思文獻風

流地欲陟龍門未有梯

長房葛陂

誰識壺中日月長化龍舊事已荒涼於今更欲呼
僊侶葛水淪漪雲樹蒼

富波廢城

東都宮闕且成塵茅土何能永不湮何事兒童同
指記雲臺閣畔画中人

登觀音閣用汝南志舊韻

彭

續副使
桐城

高閣雲開壯給孤遠天遙水近如無青山入郡平
看楚白塔盤空倒漾湖草沒王宮來野雀鐘留南
海起禪狐參差碧瓦前皇澤明月依依擁夜珠

其二

紅蕖約水起清鷗十里空堤漲汝流幾處笙歌來
古堞數家林舍傍孤洲晚青負紫峯明滅曉白搖
黃天墜浮却理殘碑看斷字好將般若歛新愁

郭林宗訪黃叔度處

薛

耳

羅令
武進

名流幾肯問牛醫獨有僊舟到竹籬徑路蕭蕭都
付草心期落落共烹葵一天雲合四方士千頃波
澄百世師磨鏡不忘今日意中郎已有墓前碑

天中山看顏魯公碑

魯公墨妙彌入神天中碑石傳其真苔痕斑駁風
霜古摩娑忽看龍蛇生千臨萬擬幾能似衣冠優
孟東家顰我肅衣冠拜寒石眷懷千古騎箕人從
來墨客筆成塚總畱姓字還微塵魯公所重寧在

此吾儕應念皆王臣蘓武節無毛絺絰衣有血卽
無筆墨落人間不道悠悠便湮失立名砥行會有
原重我悲思淚如織

袁安舊里

傅挺教諭

嫋嫋荒村柳疎烟寒氣飄幽垣隱晚牧橫砌走歌
樵山色鐘聞寺泉聲人過橋西來一線夾芳徑獨
相招

懸瓠池

從來雲水窟半是羽人鄉
簾捲青天動樵迴夜斗
涼臥霞花落枕坐洞鳥呼香
覓得藏舟處何須泛
淼茫

袁安故里

顧泰 蕪州

画圖常見先生臥墟里猶占古道存世守高風惟
築室時當雪夜但封門依然芳草烟凝社無數青
山遠照村縱是汝南多月旦應教此事獨推袁

富波廢城

荒荒雲物雜雲渦一代英雄在富波富貴何須慚
子伯波瀾全不怯淨沱雲山有士常披髮消水無
人再荷戈聊向翠光亭上望斜陽歷落動城阿

過雞黍祠

傅鶴祥 邑人

昔人重一諾鷄黍迄如今約以神相照交於信可
深天空秋色迥霜冷碧潭沈豈爲山河阻永堅金
石心登堂敦幼禮握手慶朋簪落落陽春調洋洋
流水音高風肅古道爽氣溢青岑下馬徘徊久荒

祠栢影森世情苟若此勿復絕交吟

秋日閱韓文公平淮西碑

荒原尋古立西風拂拭殘碑夕照中不是緋衣堅
大討誰來雪夜奏奇功文章自昔識山斗淮蔡於
今戴顥穹何事漫憑女子訴如茲將相摠堪崇

昌黎淮西碑

耿山客 光州

蔡州之水清且長上襟桐栢帶淮陽自周自漢而
洎唐孰敢據之逞蹶張天子曰裴度往哉希多方

裴公曰李愬奮哉式戎行鵝鴨池雪疎疎涼元濟
成擒夜未央已矣哉凱旋已酬丈夫志殘碑但餘
韓公字我有長懷似古人筆頭湧出萬年氣

拜顏魯公祠

牟璘 邑人

摩空松栢老如鐵拱揖荒祠勢凹凸下拜祠前憶
建中為傾酒煮心悲結半池玉乳薦芳蘅數武金
鋪奉老碣屹屹石頭纏厲魂荒荒碧土化英血柳
下薇陽通室壁麟心鳳掌扶唐節快君遺表死猶

生見賊鼓刀神倍悅四帝中間京洛塵一家遁作
楚燕蟻唾他藍面汚青史千載兩卿一片舌

袁閎土室詠荅督學使

夏甫矯然士高寒愛索居耽幽開別徑逃俗築吾
廬架上書無數堦前草不除蓬蒿仲蔚似蕪穢陳
蕃如勵節示其峻清修資有餘一區容散髮千里
暗辭車郵羨梓梁貴還悲旗戟虛逢人豈故拙守
我寧堪疎一食羞三卻三冬鍵一間孤稜承先烈

際亂自籛籛

天中名岫呈戴道默先生

測景分天度揆中定地陬熅烟凝衆質迢遼接雙
眸山以名稱重名因山始投鵲靈迎楚甸噎朗抱
淮流羣嶺遙宗嶽諸峯勢壓丘滴來青不斷遇處
景同遊戈石棋畱韻顏書墨尚幽雨雲隨髮現草
木貼膚柔磊砢別有態參差具其尤詩原磨道氣
命果愧僊儔崖大容名相壑寬藏巨舟取山如取

士端不一端求

王榮遺宅呈戴道默先生

遺宅荒城路侍中去轍塵誅茅懷昔日剪徑悵無
鄰荆土依人賦汝墳旅食貧高臺沒碾道遺井辨
唐人碑版畱先哲原荒走鬼燐亂離幾代更飄泊
一郵湮亭榭焚餘日英賢埋影辰鑿坏紫野蔓穿
窟止窮民寂寂絕宮路蕭蕭對牧俵悲茲荒草暮
傷彼空山春去在詎無數廢興自有因滄桑累萬

劫感嘆與誰論

汝南述古

朱金芝 浙江

由來豫士半天下高隱而今尚有人汝海二龍原
奪陸淮雲孤鶴自推荀山川已徧阮乎屐鄉里季
傳郭泰巾竹林倘許容年少鷄黍臺前好論文

懸瓠舊池

孔 暹 邑人

當日談形勝懸瓠是也非不聞鵝鴨亂尚覩將軍
國河柳依寒雪山花向夕暉觀中道士去池水清

依稀

西湖秋月

韓佐荆 郡人

陌草連雲入大湖高天搖月夜光孤晴開層閣烟
初淨影散長林鳥未呼村墅千家經治亂漁樵幾
處起匡扶更憐鐘定心如悟莫厭空明好共娛

南浦漁唱

碧烟翳樹淡高空網集澄潭宿霧中已見山川容
曠士還知天地縱漁翁歌隨菱芡清溪轉棹入芙蓉

渠迳照同回聽原頭鶯語切移時相對意難窮

坐杏韓山房和友人韻

桂繼攀 邑人

從古貧難受誦詩見北門無勞憐我憊固自望君
恩寧靜武侯策逍遙樂志論顧形還自笑錯認昔
年孫

其二

簷瓦常千里殷勤見一誠卽茲諄薦意應切衣鉢
情月印前溪色風傳遠樹聲寒上亭子山想見聖

之清

開門

傅孕岱

春明幾度雨眺聽古城東佇目平原上高飛萬里

鴻

吉祥寺繪院晤別竿長玉

孫默歙縣

知君天下士遺逸感周旋落日逢荒寺同僧話古

禪詩投黃海客人自汝南賢草草城頭別孤舟望

月圓

